

四庫全書

史部

欽定四庫全書

史部

尚史卷

二十一
二十二

翰林院編修臣謝墉覆勘

總校官檢討臣何思鈞

欽定四庫全書

尚史卷五

世家十三

鑲白旗漢軍李鐸撰

燕世家

始武王廿七年秦始皇二十五年凡九百十年傳四十三世

惠侯 禧侯 頃侯 哀侯 鄭侯

燕之先召公奭與周同姓武王滅紂封于北燕自召公以下九世至惠侯

素隱燕四十二代有二惠侯二禧侯二宣侯二桓侯

二文侯蓋國史微失本謚

當厲王奔彘共和之時惠侯薨子僖侯即位是歲宣王
初立三十六年僖侯薨子頃侯即位頃侯九年宣王崩
幽王立二十年幽王淫亂為犬戎所弑平王立周東遷
二十四年頃侯薨子哀侯即位哀侯二年薨子鄭侯即
位

索隱謚法無鄭鄭或是名

鄭侯三十六年薨

史記
世家

穆侯

七年入春秋

宣侯 桓侯 莊公 襄公 桓

公 宣公 昭公 武公 文公 懿公

穆侯鄭侯之子穆侯七年魯隱公元年也十八年

桓元年

穆侯薨子宣侯即位宣侯十三年

桓十四年

薨子桓侯即位

系本桓侯徙臨易古史考系本自宣侯已上皆父子相傳桓侯以下並不言屬以其難明故也桓侯元

年桓王崩莊王立桓侯七年

莊三年

薨子莊公即位莊公

九年

莊十年

莊王崩僖王立十四年

莊十七年

僖王崩惠王立

十六年

莊十九年

王子頹伐周不克出奔溫冬衛師南燕師

伐周立子頹十七年

莊二年

鄭執南燕伯仲父以惠王歸

處于櫟十八年

莊二十一年

鄭伯納王殺子頹

史記燕與宋衛共伐周惠王出奔溫十七年鄭執燕仲父而納惠王按伐周乃南燕伯仲父非燕莊公奔溫乃王子頹非惠王又納王在十八年非十七年也史並誤

二十七年

莊三十年

山戎侵我冬齊人伐山戎

左傳

公送齊侯出境齊侯因割公所至地予我使我共貢天

子如成周時職使復修召公之法

史記世家

三十三年

僖二年

公薨子襄公即位襄公六年

僖八年

惠王

崩襄王立三十九年

文八年

襄王崩頃王立襄公四十年

文九年

薨桓公即位

古史考系本襄伯生宣伯無桓

桓公五年

文十四年

頃王

崩匡王立十一年

宣二年

匡王崩定王立桓公十六年

宣七年

年

薨宣公即位宣公十五年

成四年

薨昭公即位昭公元

年

成五年

定王崩簡王立昭公十三年

成十七年

薨武公即位

武公二年

襄元年

簡王崩靈王立武公十九年

襄十八年

薨文

公即位文公六年

襄二十四年

薨懿公即位懿公三年

襄二十七年

年諸侯盟于宋四年

襄二十八年

公朝于晉公薨是年靈王

崩景王立

左傳

惠公 悼公 共公 平公 簡公 獻公

十四年春

秋終

孝公 成公 湣公 僖公 桓公

惠公名款

春秋昭三年書北燕伯款出奔齊六年書齊侯伐北燕而傳曰將納簡公是簡公名款也

按史簡公後惠公四代姑從史

懿公之子也元年

襄二十九年

齊高止來奔

公多寵姬公欲去諸大夫而立寵姬宋六年

昭三年

大夫

共誅姬宋

索隱宋名或作宗劉氏曰其父兄為執政故大夫共滅之

公懼奔齊我立

悼公悼公三年

昭六年

齊侯如晉請伐我晉許之齊遂伐

我將納惠公四年

昭七年

齊侯次于號

燕

我行成曰敝邑

知罪敢不聽命先君之敝器請以謝罪春二月盟于濡

上我歸燕姬賂以瑤璫玉櫝竿耳齊不克納惠公而還

九年

昭十年

齊高偃納惠公于陽

公羊伯于陽者公子陽生也蓋以公訛伯子訛于陽

下脫生字此說誤公子陽生奔魯不奔燕納北燕公

子陽亦無此書法也緣燕齊俱當悼公時故誤又史記六年惠公奔齊四年齊高偃如晉請伐燕入其君晉與齊伐燕入惠公惠公至燕而死燕立悼公此說亦誤蓋以齊侯如晉誤為高偃以納惠公于陽誤為至燕而死又上書六年下書四年是脫悼公二字

十年

昭十年三年

公薨

史作七年蓋上縮惠公出亡三年也

共公即位共公五年

昭十年八年

薨平公即位平公四年

昭二十年二年

景王崩敬王立平

公十九年

定五年

薨簡公即位簡公十二年

哀二年

薨獻公

即位

紀年簡公後次
孝公無獻公

獻公十三年

哀十
五年

齊高無平來奔

十四年

哀十
六年

孔子卒十六年

哀十
八年

敬王崩元王立二十

四年元王崩定王立二十八年公薨

左
傳

孝公即位孝公十五年薨成公即位成公九年定王崩

考王立成公十六年薨湣公即位湣公八年考王崩威

烈王立湣公三十一年薨僖公即位

年表作釐侯莊
索隱莊衍字

是

年三晉列為諸侯

紀年文公二十四年卒簡公立簡公十三年三晉命

邑為諸侯

威烈王崩安王立二十七年安王崩烈王立三十年伐齊敗于林營公薨桓公即位桓公四年烈王崩顯王立

桓公十一年薨

史記世家

文公 易王 王噲 昭王 惠王 武成王

孝王 王喜

文公

系本作閔公

桓公薨文公即位是歲秦獻公卒秦益彊

二十八年蘇秦始來見說公公予車馬金帛以至趙趙

用之因約六國為從長秦惠王以其女為太子婦二十九年公薨太子即位是為易王齊宣王因我喪伐我取十城蘇秦說齊使復歸我十城十年燕君為王蘇秦與文公夫人私通懼誅乃說王使齊為反間欲以亂齊十

二年易王薨子王噲即位

史記世家

或獻書于王噲曰燕王而不能自恃不惡卑名以事强事强可以令國安長久萬世之善計也以事强而不可以為萬世則不如合弱合弱將奈何合弱而不能如一

此臣所以為山東苦也比目之魚不相得則不能行故古人稱之以其合兩而如一也今山東合弱而不能如一一是山東之智不如魚也又如車士之引車也三人不能行索二人五人而車因行矣今山東三國弱而不能敵秦索二國因能勝秦矣然而山東不知相索者智故不如車士矣胡與越人言語不相知志意不相通同舟而凌波至其相救助如一也今山東之相與也如同舟而濟秦兵至不能相救助如一智又不如胡越之人矣

三物者人之所能為也山東主不悟此臣之所為山東

苦也願大王之熟慮之也山東相合之主不惡卑名之

國者可長厚之卒者

之猶其也
卒捍同

出土以成韓梁之西邊

此燕之上計也不急為此國必危矣王必大憂今韓梁

趙三國已合矣秦見三晉之堅也必南伐楚趙見秦之

伐楚也必攻燕物固有勢異而患同者秦之伐韓故中

山亡

秦不暇救
故趙亡之

今秦之伐楚燕必亡

趙亡之

臣竊為王計

不如以兵南合三晉約成韓梁之西邊山東不能堅為

此此必皆亡燕果以兵南合三晉

國策

是年顯王崩慎靚王立與三晉攻秦不勝而還子之相燕貴
重主斷王噲屬國于子之子之南面行王事而噲老不
聽政願為臣六年慎靚王崩赧王立子之任政三年國
大亂百姓恫恐將軍市被與太子平謀將攻子之齊王
令人謂太子平曰寡人聞太子之義將廢私而立公飭
君臣之義明父子之位寡人之國小不足以為先後雖
然唯太子所以令之太子因要黨聚眾將軍市被圍公

宮攻子之不克市被及百姓反攻太子平市被死以徇
按子之亂燕百姓恫恐太子平內順國人外倚彊齊舉
事必克何為百姓反攻太子至齊師伐燕而後士卒
不戰城門不閉乎一子之爾于太子則拒之于齊師
則迎之燕民願若是憤憤哉史遷本于國策恐誤

國構難數月死者數萬衆燕人恫恐百姓離志齊王伐
燕士卒不戰城門不閉王噲死子之亡齊大勝燕

年表君噲及太子相之子皆死紀年子之殺公子平

齊破燕擒子之而醢其身

又二年而國人共立昭王

國策以昭王即為太子平 按年表紀年一云平死于亂一云為子之所殺夫平外倚齊援內除國難卒得噲死身立是齊與有力不應懷破燕之恥成報齊之功且平幾先舉事不克而不死國滅二年而復立理殊不然是太子平與昭王非一人明矣

昭王于破燕之後即位卑身厚幣以招賢者謂郭隗曰

齊因孤之國亂而襲破燕孤極知燕小力少不足以報
然誠得賢士以共國以雪先王之恥孤之願也先生視
可者得身事之郭隗曰王必欲致士先從隗始況賢于
隗者豈遠千里哉于是王為隗改築宮而師事之樂毅
自魏往鄒衍自齊往劇辛自趙往士爭趨燕王弔凡問
孤與百姓同甘苦二十八年燕國殷富士卒樂軼輕戰
于是以樂毅為上將軍與秦楚三晉合謀以伐齊齊兵
敗湣王出亡我兵獨追北入至臨淄盡取齊寶燒其宮

室宗廟齊城不下者唯莒即墨其餘皆屬燕三十三年
昭王薨子惠王即位惠王為太子時與樂毅有隙及即
位疑毅使騎劫代將樂毅亡走趙齊田單擊敗我軍悉
復得其故城七年惠王薨

趙世家惠文王二十八年燕相成安君公孫操弑其
王樂資以為即惠王也

武成王即位韓魏楚共伐我武成王七年齊田單伐我拔
中陽十四年武成王薨子孝王即位孝王三年薨子王

喜即位王喜四年王命相栗腹約歡趙還報王曰趙可伐也于是栗腹將而攻鄢卿秦攻代趙使廉頗擊破栗腹于鄢破卿秦于代

國策廉頗以二十萬遇栗腹于鄢樂乘以五萬遇慶秦于代燕人大敗而史樂毅傳謂廉頗破卿秦樂乘于代

廉頗逐之五百餘里圍我國我請和乃解圍去六年秦滅東西周十二年趙李牧攻我拔武遂方城我使劓辛

將擊趙趙擊取我軍二萬殺劇辛二十三年太子丹質于秦亡歸二十七年我見秦王且滅六國秦兵臨易水禍且至燕太子丹陰養壯士二十人使荆軻獻督亢地圖于秦因襲刺秦王秦王覺殺軻使將軍王翦擊我二十九年秦攻拔我薊王喜亡徙居遼東斬丹以獻秦三十年秦拔遼東虜王喜卒滅燕

贊曰燕周同姓國又君薊之後乃亡宗周之義不與中國會盟邾滕恥為屬國而楚秦醜于自夷燕顧何心夷

然自外耶昭王末奮若將嗣伯似續不副厥成天也語
有之虎皮蒙羊餽肉于狼君噲子之乃為堯舜禪也

尚史卷二十

欽定四庫全書

尚史卷二十一

世家十四

鑲白旗漢軍李銘撰

韓世家

始威烈王二十三年終秦始皇十七年凡百七十四年自景侯至王安傳十一世

景侯 列侯 文侯 哀侯 懿侯 昭侯

韓之先與周同姓曲沃武公之叔父也自韓萬封韓累

傳至韓厥韓不信

並見
晉傳

不信是為韓簡子簡子卒子庚

代是為莊子莊子卒子虎代是為康子康子與趙襄子

魏桓子共敗知伯分其地益大大于諸侯康子卒子啟章

代是為武子武子二年伐鄭殺其君幽公

紀年晉烈公元年
韓武子都平陽

十六年武子卒子虔代是為景侯景侯元年伐鄭取雍邱

二年鄭敗我負黍六年與趙魏俱得列為諸侯九年鄭

圍我陽翟景侯薨子列侯取即位

系本作武

列侯九年秦伐

我宜陽取六邑十三年薨諡曰列在位十三年子文侯

即位

紀年無文侯
系本無列侯

文侯二年伐鄭取陽城伐宋至彭城

執宋君七年伐齊至桑丘九年伐齊至靈丘十年薨諡

曰文在位十年子哀侯即位哀侯元年與趙魏分晉國

二年滅鄭因徙都鄭

史記世家

紀年魏武侯二十二年晉桓公邑韓哀侯于鄭是韓
既徙都因改號曰鄭故國策謂韓惠王曰鄭惠王猶
魏徙大梁稱梁王也

六年韓嚴弒哀侯及相韓傀

國策

史記年表世家皆書列侯三年聶政殺相俠累
哀侯六年書韓嚴弒哀侯而刺客傳書嚴仲子事哀

侯與相俠累有隙使聶政刺殺之國策韓傀相韓嚴
遂重于其君二人相害嚴遂使聶政刺俠累累走抱
哀侯並中哀侯仲子蓋嚴遂字俠累韓傀字也

謚曰哀在位六年子懿侯即位

紀年韓山堅弑其君哀侯而韓若山立若山即懿侯
韓山堅即韓嚴也

懿侯二年魏敗我馬陵五年與魏惠王會宅陽九年魏
敗我澮十二年薨謚曰懿在位十二年子昭侯即位

紀年

名武昭侯元年秦敗我西山二年宋取我黃池六年伐東

周取陵觀邢邱八年申不害相修術行道國內以治

按此下史云十年韓姬弑其君悼公悼公為誰且昭侯事中攙入悼公恐誤

十一年昭侯如秦二十四年秦拔我宜陽二十五年旱

作高門二十六年高門成昭侯薨

史記世家

謚曰昭在位二十六年

宣惠王 襄王 釐王 桓惠王 王安

宣惠王昭侯之子也

紀年鄭昭侯武薨次威侯立威侯七年與邯鄲圍襄陵五月梁惠王會威侯于巫沙十月鄭宣王朝梁威侯宣王不紀薨立紀年亦不足據也

昭侯薨宣惠王即位八年魏敗我將韓舉

紀年在威侯八年

十一年君號為王與趙會區鼠十四年秦敗我鄢十六年秦敗我修魚虜我將鮑申差我急將西購于秦與之

南伐楚楚王聞之大恐乃興師言救我戰車滿道路發
信臣多其車重其幣王聞之大說相公仲侈諫不聽遂
絕秦秦因大怒益甲伐我大戰楚救不至十九年大破
我岸門太子倉質于秦以和二十一年與秦共攻楚敗
楚將屈丐是年王薨謚宣惠在位二十一年太子倉即
位是為襄王襄王四年與秦武王會臨晉秋秦甘茂攻
我宜陽五年拔宜陽斬首六萬六年秦與我武遂九年
秦復取我武遂十年太子嬰朝秦而歸十一年秦伐我

取穰與秦伐楚敗楚將唐昧十二年太子嬰死公子咎

公子蟊虱爭為太子時蟊虱質于楚韓咎

韓咎韓人與公子咎別是

一令楚圍我雍氏將因韓楚奉蟊虱而內之公仲侈以

國合于齊楚于是楚解雍氏圍蟊虱竟不得歸立公子

咎為太子齊魏王來十四年與齊魏共擊秦至函谷而

軍焉十六年秦與我河外及武遂王薨謚曰襄在位十

六年太子咎即位是為釐王釐王三年使公孫喜率周

魏攻秦秦敗我軍二十四萬虜喜伊闕五年秦拔我宛

六年與秦武遂地二百里十年秦敗我師于夏山十二年與秦昭王會西周佐秦攻齊齊敗十四年與秦會西周間二十一年使暴載救魏為秦所敗載走開封二十三年趙魏攻我華陽我告急于秦秦救我敗趙魏于華陽之下是年王薨謚曰釐在位二十三年子桓惠王即位桓惠王元年伐燕九年秦拔我涇城汾旁十年秦擊我于大行我上黨郡守以上黨降趙十四年秦拔趙上黨殺趙卒四十餘萬于長平十七年秦拔我陽城負秦

二十四年秦拔我城皋滎陽二十六年秦悉拔我上黨
二十九年秦拔我十三城三十四年王薨謚桓惠在位
三十四年子王安即位王安五年秦攻我我急使韓非
使秦秦留非殺之九年秦虜王安盡入其地為潁川郡

韓遂亡

史記
世家

贊曰厥起厚基韓氏用昌卒得南面平陽分晉滅鄭然
韓最近秦使宣惠以還翼魏挾趙連和齊楚腹心秦疾
秦雖暴無如韓何迺二三厥德詐力相尚連秦勢既熾

然後仰關西攻偏敗衆携宜不濟也韓業餒肉虎口韓
非鯁生顧將廟其牙而探之悲夫

魏世家

始威烈王二十三年終秦始皇二十二年
凡百七十九年自文侯至王假傳九世

魏桓子 文侯 武侯

魏之先畢公高之後也高封于畢于是為畢姓其後絕
封為庶人或在中國或在夷狄其苗裔曰畢萬事晉獻
公獻公滅魏以封萬為大夫萬生武子犢犢生莊子絳
史記世家武子生悼子悼子徙治霍系本武仲生莊

子絳無悼子而系本居篇又曰魏武子居魏悼子徙霍是有悼子也然內外傳皆有悼子

絳生獻子舒

史記世家絳生魏嬴嬴生獻子系本獻子名荼莊子之子無魏嬴同左氏

舒生簡子取取生襄子曼多

史記世家獻子生魏侈無簡子一代侈一作哆即魏曼多也以上詳晉列傳

曼多生桓子駒

系本

按史記以桓子為襄子孫代系多不合

駒與韓康子趙襄子共伐滅知伯分其地駒之孫曰文侯斯
按世本作斯系本同而其傳曰孺子疵是魏駒之子史
記作都

文侯元年周威烈王之二年也六年城少梁八年復城
少梁十三年使子擊圍繁龐出其民十六年伐秦築臨
晉元里十七年伐中山使子擊守之趙倉唐傳之

說苑文侯使子擊守中山趙倉唐傳之居三年往來
之使不通于君倉唐問曰胡不遣人使上國乎擊曰
願之久矣誰可者倉唐請行問君所嗜好擊曰嗜晨
鳧好壯犬乃遣倉唐縹北犬而奉晨鳧獻于文侯倉
唐至上謁曰孽子擊使者不敢見于朝請以燕間奉
晨鳧敬獻庖人縹北犬敬上涓人文侯悅曰擊愛我
不忘吾所嗜好者召倉唐見之曰擊無恙乎倉唐曰
唯唯如是者三乃曰太子在外君國名非臣所得聞

也文侯怵然為之變容曰子之君無恙乎曰臣之來也拜送書于庭文侯顧指左右曰子之君孰與是長曰擬人必于其倫國君無所擬之文侯曰長大孰與寡人曰君賜之外府之衣則能勝之賜之斥帶則不更造矣文侯曰子之君何業曰業詩文侯曰于詩何好曰好晨風黍離文侯誦晨風曰子之君以我忘之乎曰非敢也思君耳文侯復誦黍離曰子之君怨乎曰非敢也思君耳文侯于是遣倉唐賜太子襲衣曰

必以雞鳴時至太子發篋視之衣盡顛倒曰君侯召
擊矣倉唐曰臣未聞命也擊曰君命子以雞鳴至而
衣盡顛倒詩不云乎東方未明顛倒裳衣顛之倒之
自公召之遂西見文侯文侯大喜置酒而稱曰遠賢
而近所愛非社稷之計也乃出少子摯封之中山而
復太子摯

子摯西攻秦至鄭而還築雒陰合陽二十二年列為諸
侯二十四年秦伐我至陽狐二十六年號山崩壅河三

十二年代鄭城酸棗敗秦于注三十五年齊伐我取襄陵三十六年秦侵我陰晉三十八年代秦敗之武下得其將識是年文侯薨

史記世家紀年云五十年

韓趙嘗相難韓索兵于我曰願得借師以伐趙文侯曰寡人與趙兄弟不敢從趙又索兵以攻韓文侯曰寡人與韓兄弟不敢從二國不得兵怒而反已乃知文侯已講于已也皆朝魏文侯與虞人期獵是日飲酒樂天雨文侯將出左右曰公將焉之文侯曰吾與虞人期獵雖

樂豈可不一會期哉乃往身自罷之

國策 韓
非子 略同

文侯受子夏經藝客段干木過其廬未嘗不軾也仕西
門豹守鄴而河內稱治秦嘗欲伐魏或曰魏君賢人是
禮國人稱仁上下和合未可圖也文侯由此得譽于諸
侯

淮南子解扁為東封上計而入三倍有司請賞之文
侯曰吾土地非益廣人民非益衆入何以三倍對曰
以冬伐木而積之于春浮之河而鬻之文侯曰民春

以力耕暑以強耘秋以收斂冬閒無事伐林而積之
負輓而浮之河是用民不得休息民以敝矣雖三倍
入將焉用之說苑文侯觴大夫于曲陽飲酣文侯喟
然嘆曰吾獨無豫讓以為臣蹇重舉酒進曰臣請浮
君文侯曰何以對曰臣聞有命之父母不知孝子有
道之君不知忠臣夫豫讓之君亦何如哉文侯曰善
又曰文侯與大夫飲酒使公乘不仁為觴政曰飲不
嚼者浮以大白文侯飲不盡嚼公乘不仁舉白浮君

曰周書曰前車覆後車戒蓋言其危今君已設令令不行可乎君曰善以公乘不仁為上客新序文侯出遊見路人反裘而負芻文侯曰胡為反裘而負芻對曰臣愛其毛文侯曰若不知裏盡而毛無所恃邪明年東陽上計錢布十倍大夫畢賀文侯曰此非所賀也無異夫反裘而負芻也今吾田地不加廣士民不加衆而錢十倍必取之士大夫也吾聞之下不安者上不可居也又曰文侯見箕季其牆壞而不築文侯

曰何為不築對曰不時牆枉而不端問曰何不端曰
固然從者食其園之桃李禁之少焉日晏進糲餐
之食瓜瓠之羹丈侯出曰吾一見季而得四焉牆壞
不築云侍時者教我無奪農時也牆枉而不端曰固
然者教我無侵封疆也從者食桃李禁之教我下
無侵上也食以糲餐者教我無多斂于百姓也韓詩
外傳文侯問狐卷子曰父賢足恃乎曰不足子賢足
恃乎曰不足兄賢足恃乎曰不足弟賢足恃乎曰不

足臣賢足恃乎曰不足文侯作色曰五者一一為不足何也對曰父堯而丹朱放子舜而瞽瞍頑兄舜而象傲弟周公而管叔誅臣湯武而桀紂伐望人者不至恃人者不久君欲治從身始符子文侯見宋陵子三仕不願文侯曰何貧乎曰楚富者牧羊九十九而願百其鄰人貧有一羊者富拜之曰吾羊九十九今君之一盈成我百則牧數足矣鄰人與之從此觀焉富者非富貧非貧也

薨謚曰文在位三十八年

漢書儒家魏文侯六篇

子擊即位是為武侯元年趙公子朔為亂敬侯來奔與我襲邯鄲我敗而去二年城安邑王垣七年伐齊至桑邱九年翟敗我于澮我使吳起伐齊至靈邱十一年與韓趙三分晉地滅其後十五年敗趙北蘭十六年代楚

取魯陽武侯薨

史記世家

謚曰武在位十六年

惠王

惠王名瑩武侯之子也武侯薨王即位初武侯之薨也公中緩與惠王爭為太子公孫頤自宋入趙自趙入韓謂韓懿侯曰魏瑩與公中緩爭為太子君亦聞之乎今

魏瑩得王錯

魏大夫紀年惠王二年魏大夫王錯出奔韓

挾上黨固半國也

因而除之破魏必矣不可失也懿侯說乃與趙成侯伐我戰于濁澤我大敗或為趙謂韓曰除魏君立公中緩割地而退我且利韓曰不可殺魏君人必曰暴割地而退人必曰貪不如兩分之魏分為兩不彊于宋衛則我

終無魏之患矣趙不聽韓不說以其少卒夜去二年敗韓于馬陵敗趙于懷三年齊取我觀五年與韓會宅陽城武堵為秦所敗六年伐宋取儀臺九年取韓于澮與秦戰少梁虜我將公孫痤取龐十年伐趙取皮牢彗星見十二年星晝墜有聲十四年與趙會高十五年魯衛宋鄭君來朝

按紀年在十四年鄭君鄭釐侯也鄭釐侯者韓昭侯也韓滅鄭改號鄭

十六年與秦孝公會社平侵宋黃池宋復取之十七年與秦戰元里秦取我少梁圍趙邯鄲十八年拔邯鄲趙請救于齊齊救趙敗我桂林十九年諸侯圍我襄陵築長城塞固陽二十年歸趙邯鄲與盟漳水上

魏策龐蔥與太子質于邯鄲謂魏王曰今一人言市有虎王信之乎王曰否二人言市有虎王信之乎王曰寡人疑之矣三人言市有虎王信之乎王曰寡人信之矣龐蔥曰夫市之無虎明矣然而三人言而成

虎今邯鄲去大梁也遠于市而議臣者過于三人願
王察之也王曰寡人自為知于是辭行而讒言至後
太子罷質果不得見 史無質太子事

十一年與秦會彤二十八年中山君相三十年伐趙趙
告急齊齊救趙擊我我大興師使龐涓將令太子申為
上將軍與齊人戰敗于馬陵齊虜太子申殺將軍涓軍
大破三十一年秦趙齊伐我秦商鞅詐我將軍公子卬
而襲破之秦用商鞅東地至河而齊趙數破我安邑近

秦于是徙治大梁以公子赫為太子三十五年與齊宣王會平阿南三十六年復與齊王會甄是年王薨

紀年惠成王三十六年改元稱一年後十七年卒

王數敗于軍旅卑禮厚幣以招賢者鄒衍淳于髡孟軻皆至梁軻以仁義說王王不能用

史記世家

王在位三十六年謚曰惠

襄王 哀王

襄王名嗣

系本

惠王之子也惠王薨王卽位元年與諸侯會徐州稱王

追尊父惠王為王

徐廣曰二年伐趙

五年秦敗我龍賈軍于雕

陰圍我焦曲沃予秦河西地六年與秦會應秦取我汾
陰皮氏焦我伐楚敗之陘山七年我盡入上郡于秦秦
降我蒲陽八年秦歸我焦曲沃十二年楚敗我襄陵諸
侯執政與秦相張儀會齧桑十三年張儀相我有女子
化為丈夫秦取我曲沃平周十六年王薨

紀年魏襄王十九年薛侯來會王于簽邱二十年王

與齊王會于韓

諡曰襄在位十六年子哀王即位

紀年起自黃帝終魏之今王今王者魏惠成王子而以襄王之年為惠成王之後十七年世本惠王生襄王襄王生昭王而無哀王並誤

張儀復歸秦哀王元年五國共攻秦

韓魏楚趙燕

不勝而去

二年齊敗我觀津五年秦穰里疾伐我取曲沃走犀首

岸門

索隱犀首官名即公孫行

六年秦求立公子政為太子

政魏公子與

秦會臨晉七年攻齊與秦伐燕八年伐衛拔列城二

紀年

翟章伐衛

九年與秦王會臨晉張儀魏章皆來歸

章為魏將後相秦

相田需卒太子為相十一年與秦武王會應十二年太

子朝秦秦伐我皮氏未拔而解十四年秦來歸我王后

十六年秦拔我蒲反陽晉封陵

紀年作晉陽封谷

十七年與秦

會臨晉秦與我蒲反十八年與秦伐晉二十一年與齊

韓共敗秦軍函谷二十三年秦復予我河外及封陵以

和是年王薨

史記世家

謚曰哀在位二十三年

紀年終于二十年昭王三年喪畢始稱元年

昭王 安釐王 景湣王 王假

昭王名邀

系本

哀王之子也哀王薨王即位元年秦拔我襄城二年與秦戰不利三年佐韓攻秦秦白起破我軍伊闕二十四

萬六年予秦河東地方四百里芒卯以詐重

事見芒卯傳

七

年秦拔我城六十一九年秦拔我新垣曲陽城十年齊

滅宋宋公死我溫十二年與秦趙韓燕共伐齊敗之濟西湣王出亡燕獨入臨菑與秦王會西周十三年秦拔

我安城兵至大梁去

徐廣曰十四年大水

十九年王薨

史記世家

謚曰昭在位十九年子安釐王即位安釐王名圉

系本

元年秦拔我兩城二年又拔我二城軍在梁下韓來救予秦溫以和三年秦拔我四城斬首四萬四年秦破我及韓趙殺十五萬人走我將芒卯段干子請予秦南陽以和九年秦拔我懷十年秦太子外質于我死十一年

秦拔我鄆邱齊楚相約而攻我我使求救于秦秦救我
魏氏復定王以秦救我故欲親秦而伐韓以求故地信
陵君無忌諫乃止二十年秦圍邯鄲無忌矯奪將軍晉
鄙兵以救趙趙得全無忌因留趙三十年無忌來歸率
五國兵攻秦敗之河內走蒙驁太子增質于秦秦怒欲
囚增蘇秦為增謂秦王曰公孫衍史記作公孫喜固謂魏相曰
請以魏疾擊秦秦王怒必囚增魏王又怒擊秦秦必傷
今王囚增是衍之言中也故不若貴增而合魏以疑之

于齊韓秦乃止三十四年王薨謚安釐在位三十四年

太子增即位是為景湣王

系本作景
愍王午

信陵君無忌卒景

湣王元年秦拔我二十城以為東郡二年秦拔我朝歌

三年秦拔我汲五年秦拔我垣蒲陽衍

徐廣曰十二
年獻城秦

十

五年王薨謚景湣在位十五年子王假即位

徐廣曰二
年新鄭反

王假三年秦灌大梁虜王假遂滅魏

史記
世家

列女傳秦殺假

贊曰文侯受子夏經客段干木秦遂不敢加兵然則賢

者固所以警敵國禦外侮者歟子輿氏間關造魏庶幾
惠成尚祖德而踵前修蓋深有意也乃茂仁專利棄賢
勿務兵破于齊地逼于秦舍安邑徙大梁所謂我能往
寇亦能往徙且安之乎本實先拔強延六葉幸矣然信
陵一振五國奮蒙驚犇嗟乎信陵不死魏未必亡信陵
其亦賢者之亞與

趙世家

始威烈王二十三年終秦始皇二十五年
凡百八十二年自獻侯至王嘉十十二世

烈侯 武侯 敬侯 成侯 肅侯

趙氏之先與秦共祖至中行為帝大戊御其後蜚廉有子二人惡來其後為秦季勝其後為趙季勝生孟增孟增幸于成周王是為宅皐狼生衡父衡父生造父造父善御幸于穆王

列子造父之師曰泰豆氏造父始從習御泰豆三年不告造父執禮愈謹泰豆乃告之曰汝先觀吾趣趣如吾然後六轡可持六馬可御造父曰唯命泰豆乃立木為塗僅可容足計步而置履之而行趣走往還

無跌失也造父學之三日盡其巧泰豆嘆曰子何敏也凡所御者亦如此得之于銜應之于轡得之于轡應之于手得之于手應之于心則不以目視不以策驅心閑體正六轡不亂而二十四蹄所投無差迴旋進退莫不中節然後輿輪之外可使無餘轍馬蹄之外可使無餘地山谷之險原隰之夷視之一也吾術窮矣汝其識之

造父取驥之乘匹與桃林盜驪驊騮耳獻之穆王穆

王使造父御西巡狩見西王母樂之忘歸而徐偃王反
穆王日馳千里馬攻徐偃王大破之乃賜造父以趙城
繇此為趙氏自造父以下六世至奄父曰共仲宣王伐
戎奄父為御及千畝之戰王師敗績奄父脫王于難奄
父生叔帶叔帶之時幽王無道去周如晉事晉文侯始
建趙氏于晉國自叔帶以下趙宗益興五世而生趙夙
晉獻公之十六年伐霍魏耿而趙夙為將伐霍霍公求
來一作犇齊晉大旱卜之曰霍太山為祟夙召霍君于齊

復之以奉霍太山之祀晉復襁獻公賜夙耿夙生共孟
共孟生趙哀哀卒子盾嗣盾卒子朔嗣朔死後十五年
子武嗣武生成成生鞅是為簡子廢太子伯魯而以無
卹為太子簡子卒無卹嗣是為襄子于是趙北有
代南并知氏彊于韓魏襄子三十三年卒伯魯孫

浣嗣

史記
世家

按自趙夙至襄子凡九世並見前晉諸臣列傳

是謂獻侯獻侯浣代安成君周之子故太子伯魯之孫

也

系本代成君起
即襄子之子

襄子為伯魯之不立也不肯立子代

成君先死乃取代成君子浣立為太子襄子卒浣即位
是為獻侯獻侯少即位治中牟襄子弟桓子逐獻侯自

立于代

系本作
襄子子

一年卒國人曰桓子立非襄子意乃共

殺其子而復迎立獻侯十三年城平邑

紀年晉烈公元年趙襄子城泣氏

十五年薨謚曰獻在位十五年子烈侯籍即位烈侯六
年韓魏趙皆立為諸侯追尊獻子為獻侯烈侯九年薨

謚曰烈在位九年弟武公即位

譙周云系本及說趙語者並無其事 又按三晉皆

自侯僭王無稱公者

武公十三年薨謚曰武在位十三年趙立烈侯太子章
是為敬侯敬侯元年武公子朝作亂不克出奔魏趙始
都邯鄲二年敗齊于靈邱三年救魏于廩丘大敗齊人
四年魏敗我免臺築剛平以侵衛五年齊魏為衛攻我
取我剛平六年借兵于楚伐魏取棘蒲八年拔魏黃城

九年伐齊齊伐燕我救燕十年與中山戰于房子十一年韓魏趙共滅晉分其地伐中山又戰于中人十二年薨諡曰敬在位十二年子成侯種即位成侯元年公子勝與成侯爭立為亂二年六月雨雪三年伐衛取鄉邑七十三衛敗我蘭四年與秦戰高安敗之五年伐齊于鄆魏敗我懷攻鄭敗之以與韓韓與我長子六年中山築長城伐魏敗之涿澤圍魏惠王七年侵齊至長城與韓攻周

此下有八年與韓分周為兩事周紀無之

九年與齊戰阿下十年攻

衛取甄十一年秦攻魏我救之石阿十二年秦攻魏少
梁我救之十三年魏敗我澮取皮牢成侯與韓昭侯遇
上黨十四年與韓攻秦十五年助魏攻齊十六年與韓
魏分晉封晉君以端氏十七年成侯與魏惠王遇葛孽
十五年與齊宋會平陸與燕會阿二十年魏獻榮椽
劉氏云榮椽蓋地名康成云榮屋翼也說文椽椽也
屋椽之兩頭起者為榮

二十一年魏圍我邯鄲二十二年魏惠王拔我邯鄲齊

亦敗魏于桂陵二十四年魏歸我邯鄲與魏盟漳水上

秦攻我蘭二十五年成侯薨諡曰成在位二十五年公

子緤與太子語爭立

系本肅侯名語

緤敗亡奔韓太子即位是

為肅侯肅侯元年奪晉君端氏徙處屯留二年與魏惠

王遇于陰晉三年公子范襲邯鄲不勝而死四年朝天

子六年攻齊拔高唐七年公子刻攻魏首垣十一年伐

魏十五年起壽陵

史記世家

十六年蘇秦自燕之趙始合從說肅侯一韓魏齊楚燕

趙六國從親以償畔秦肅侯乃封蘇秦為武安君飾車百乘黃金千鎰白璧百雙錦繡千純以約諸侯

國策

史記蘇秦既約六國從親歸趙乃投從約書于秦秦兵不敢闚函谷關十五年其後秦使犀首欺齊魏與共伐趙敗從約按國策約從在肅侯十六年至十八年齊魏伐趙蓋即犀首敗從之事然則合從裁及二年而云十五年不敢闚函谷關史詞辭爾

十七年圍魏黃不克築長城十八年齊魏伐我我決河

水灌之兵去二十二年趙疵與秦戰敗秦殺疵河西取我蘭離石二十三年韓舉與齊魏戰死于桑邱

徐廣曰韓舉韓將非是蓋趙將也韓將戰死何預趙事而紀趙世家紀年亦曰趙將

二十四年肅侯薨秦楚燕齊魏出銳師各萬人來葬

史記

世
家

謚曰肅在位二十四年

武靈王 惠文王

武靈王名雍肅侯之子也肅侯薨王即位元年陽文君趙豹相梁襄王與太子嗣韓宣王與太子倉來朝信宮武靈王少未能聽政博聞師三人左右司過三人及聽政先問先王貴臣肥義加其秩國三老年八十月致其

禮

年表魏敗我趙趙

三年城鄔四年與韓會于區鼠五年娶韓

女為夫人八年五國相王趙獨否曰無其實敢處其名乎令國人謂已曰君九年與韓魏共擊秦秦敗我斬首八萬齊敗我觀澤十年秦取我西都及中陽齊破燕十

一年王召公子職于韓立以為燕王使樂池送之

紀年同燕世家無之蓋趙遙立職實未嘗入燕

十三年秦拔我蘭虜將軍趙莊楚魏王來過邯鄲十四
年趙何攻魏十七年王出九門為野臺以望齊中山之
竟十八年秦武王死王使代相趙固迎公子稷于燕送
歸立之是為昭王十九年春正月大朝信宮召肥義與
議天下五日而畢王北畧中山之地至于房子遂之代
北至無窮西至河登黃華之上召樓緩

別是一人非武成王時樓緩也

謀欲胡服騎射以教百姓樓緩曰善羣臣皆不欲使告

公子成公子成不可王遂自請之

語見公子成傳

公子成聽命

于是遂胡服招騎射

淮南子武靈王貝帶鷁翱而朝趙國化之

二十年王畧中山地至寧葭西畧地至榆中林其王

獻馬歸使樓緩之秦仇液之韓王賁之楚富丁之魏趙

爵之齊趙固致中林兵二十一年攻中山趙招為右

軍許鈞為左軍公子章為中軍王并將之牛翦將軍騎

趙希并將燕代趙與之陞合軍曲陽攻取丹邱華陽鵠之塞王軍取鄆石邑封龍東垣中山獻四邑和王許之

罷軍二十三年攻中山二十五年惠后卒

太子車之母

使周

昭胡服傳王子何二十六年復攻中山攘地北至燕代西至雲中九原二十七年五月戊申大朝于東宮傳國立王子何為王是為惠文王惠文王惠后吳娃子也武靈王自號為主父主父欲令子主治國而身胡服將士大夫西北畧燕地而欲從雲中九原直南襲秦于是詐

自為使者入秦秦昭王不知已而怪其狀甚偉非人臣之度使人逐之而主父馳已脫關矣審問之乃主父也秦人大驚主父所以入秦者欲自畧地形因觀秦王之為人也惠文王二年主父行新地遂出代西遇樓煩王于西河而致其兵三年滅中山遷其王于膚施起靈壽北地方從代道大通還歸行賞大赦置酒酺五日封長子章為代安陽君四年主父及王遊沙邱與宮公子章作亂殺肥義公子成李兑以兵入距難公子章敗往走

主父主父開之

謂容其入宮藏也

成兌因圍主父宮公子章死

成兌謀曰以章故圍主父即解兵吾屬夷矣乃遂圍主父令宮中後出者夷宮中人悉出主父欲出不得又不
得食探爵轂而食之三月餘而餓死沙邱宮

索隱武靈王葬代郡靈邱縣括地志墓在蔚州靈邱

縣東三十里

主父定死乃發喪赴諸侯主父謚武靈王在位二十七年
而傳位又四年薨是時王少成兌專政五年與燕鄭易

八年城南行唐九年趙梁將與齊合軍攻韓至魯關下
十一年董叔與魏伐宋得河陽于魏秦取梗陽十二年
趙梁將攻齊十三年韓徐將攻齊十四年相國樂毅將
趙秦韓魏燕攻齊取靈邱與秦會中陽十五年燕昭王
來見趙與韓魏秦共攻齊齊王敗走燕深入取臨菑十
六年秦復與趙數擊齊齊人患之蘇厲為齊遺王書曰
齊之所以伐者以事王也天下屬行以謀王也齊背五
國之約而殉王之患西兵以擊彊秦齊之事王宜為上

倭而今乃抵罪今王毋與天下攻齊天下必以王為義
齊抱社稷而厚事王王以天下善秦秦暴王以天下禁
之是一世之名寵制于王也于是趙乃謝秦不擊齊王
與燕王遇廉頗將攻齊昔陽取之十七年樂毅將攻魏
伯陽秦怨趙不擊齊伐趙拔我兩城十八年秦拔我石
城王再之衛東陽決河水伐魏大潦漳水出魏冉來相
十九年秦拔我二城趙與魏伯陽趙奢將攻齊麥邱取
之二十年廉頗將攻齊與秦昭王遇西河外

年表與秦
會澠池

二十一年徙漳水武平西二十二年大疫置公子丹為太子二十三年樓昌將攻魏幾不能取廉頗攻幾取之二十四年廉頗將攻魏房子拔之又攻安陽取之二十五年燕周將攻昌城高唐取之與魏共擊秦秦將白起破我華陽得一將軍二十六年取東胡歐代地二十七年徙漳水武平南封趙豹為平陽君王母弟河水出大潦二十八年藺相如伐齊至平邑罷城北九門大城二十九年秦韓相攻而圍閼與趙使趙奢將擊秦大破秦軍

閼與下三十三年王薨

史記世家

謚惠文在位三十三年

孝成王 悼襄王 幽繆王 趙王嘉

孝成王名丹惠文王太子也惠文王薨太子丹即位是為孝成王元年秦伐我拔三城王新立秦急攻之我求

救于齊以長安君為質

長安君惠文王少子

齊兵將出齊田單將

我師而攻燕中陽拔之又攻韓注人拔之二年惠文后

卒田單為相四年王夢衣偏袷之衣乘飛龍上天不至

而墜見金玉之積如山明日王召筮史敢占之曰夢偏衣聚之衣者殘也乘飛龍上天不至而墜者有氣而無實也見金玉之積如山者憂也後三日韓上黨守馮亭使者至曰韓不能守上黨欲入之秦吏民安為趙不欲為秦有城市邑十七願入之趙趙遂發兵取上黨廉頗將軍軍長平七年廉頗免趙括代將秦圍括括以軍降卒四十餘萬皆阬之王還不聽秦秦圍邯鄲八年趙勝如楚請救還楚來救九年魏公子無忌亦來救秦圍乃

解十年燕攻昌壯

壯當作城一作社

拔之樂乘慶舍攻秦信梁

軍破之太子死

索隱趙太子史失名徐廣曰是歲周郝王卒或者太子云天子此說誤書法無曰天子死者

而秦攻西州拔之徒父祺出

索隱祺趙大夫正義秦拔西州故令徒父祺將兵出境按史記十年事多未詳或太子死當在拔西州之下蓋趙破秦軍而秦拔西州為一事太子死而徒

父祺出為一事不然而字義不屬

十一年城元氏縣上原十四年趙勝卒十五年封廉頗
為信平君燕王令丞相栗腹約驪以五百金為王酒還
歸伐我栗腹攻鄒卿秦攻代廉頗將破殺栗腹虜卿秦
十六年廉頗圍燕以樂乘為武襄君十七年樂乘攻燕
圍其國十八年延陵鈞帥師從廉頗助魏攻燕秦拔我
榆次三十七城十九年趙與燕易土以龍兑汾門臨樂
與燕燕以葛武陽平舒與趙二十年秦拔我晉陽二十

一年王薨謚孝成

史記世家

初齊人李伯見孝成王王說之以為代郡守居無幾何

人告之反孝成王方饋不墮食告者復至孝成王不應

已乃使使者言齊舉兵擊燕

按代地非齊所經恐誤

恐以擊燕為

名而絕趙故發兵自備今燕齊已合臣請要其敝而地

可多割也自是之後為孝成王從事于外者人無自疑

趙策孝成王在位二十一年子偃即位是為悼襄王是年

廉頗將攻繁陽取之使樂乘代之廉頗攻樂乘乘走廉

頗亡入魏悼襄王元年大備

正義謂行大備之禮徐廣曰一作修

魏欲通平邑中年之道不成

正義平邑中年時屬魏欲渡黃河作道相通遂不成也按上大備之義未詳且無此書法又魏欲通

道當繫之魏世家不應入趙竊謂悼襄既立而廉頗入魏或畏其來攻故大備魏也又按下文五年傅抵將居平邑是平邑屬趙不屬魏蓋趙欲以平邑與魏

中年之道相通而不成也武靈王時起靈壽北地方
從代道大通還歸行賞是通道為趙之故事然則大
備魏當為句通平邑趙事故繫之趙世家

二年李牧將攻燕拔武遂方城秦召春平君

年表太子從質秦歸正義太子即春平君 按此蓋

即趙王遷也

因而留之泄鈞

趙人

說秦秦遣之我城韓臯三年龐煖將

攻燕擒其將劇辛四年龐煖將趙楚魏燕之銳師攻秦

叢不拔移攻齊取饒安五年傅祗將居平邑慶舍將東陽河外師守河梁六年魏與我鄴九年攻燕取狸陽城

狸當作漁

兵未罷秦攻鄴拔之是年王薨謚悼襄在位九年

攻燕取狸幽繆王遷即位遷母倡也嬖于悼襄王悼襄王廢適子嘉立遷幽繆王元年城栢人二年秦攻武城扈輒率師救之軍敗死焉三年秦攻赤麗宜安李牧率師與戰肥下却之封牧為武安君四年秦攻番吾李牧却之五年代地大動自樂徐以西北至平陰屋大半壞地圯

東西百三十步六年大饑七年秦攻趙李牧司馬尚擊
之李牧誅司馬尚免趙忽

國策忽作葱

及齊將顏聚代之趙

忽軍破顏聚亡去以王遷降

徐廣曰王遷流于房陵思故鄉作山水之謳聞者莫
不隕涕

王遷無行信讒誅良將李牧用郭開以至于亡王遷在
位七年追謚為幽穆王

徐廣曰王遷無謚蓋趙滅後人竊追謚之或太史公

別有所見而記之括地志王遷墓在房州房陵縣西九里

八年邯鄲為秦趙之亡大夫共立悼襄王故適子嘉為王王代六歲秦進兵破之遂滅趙以為郡

史記世家

贊曰毋卹雄桀也而嗣趙趙之興也宜矣通其志者為武靈方其胡服騎射畧樓煩中山欲從雲中九原直南襲秦何其壯也武靈不死秦之北門殆不啟與迺猛噬之氣馴諸枕席食穀沙邱為天下笑夫春秋多楚患制

楚者晉也而鄭實操其紐六國苦秦暴制秦者齊也而趙實扼其吭卒之閔與前振長平繼隳廉藺奢收接踵無補魚爛自中若薦腥然秦雖不欲虎噬又安得耶

田齊世家

始安王十六年終秦始皇二十六年凡百六十六年自太公至王建傳七世

太公桓公

陳之先完者陳厲公躍之子也

史記世家作佗非是

完為陳大夫

宣公殺太子禦寇完奔齊為工正卒謚為敬仲完生穉

孟夷

系本作夷孟思

完之如齊以陳字為田氏

應劭云始食采地由是改姓田氏索隱陳田二字聲相近遂為田氏

田穉孟夷生湑孟莊

系本作閭孟
克莊一作莊

湑孟莊生文子須無

文子卒生桓子無字桓子卒生武子開與僖子乞僖子行陰德于民得齊衆心宗族益彊民思田氏僖子立齊悼公為相專齊僖子卒子常嗣是為田成子成子弑齊簡公立平公成子為相齊國之政皆歸成子割齊自安平以東至郎邪自為封邑封邑大于平公之所食成子

卒

成子以上
詳見齊傳

子襄子盤嗣

世本名班史記世家田常選齊國中女子長七尺以上為後宮後宮以百數而使賓客舍人出入不禁及常卒有七十餘男鮑昱云陳成子有數十婦生男百餘譙周古史考按春秋陳恒雖負殺君之名至于行事亦修整非苟為獸禽之行夫成事在姦雖子七十祇以長亂事豈然哉

襄子相齊宣公使其兄弟宗人盡為齊都邑大夫且以

有齊國襄子卒子莊子伯嗣莊子相宣公莊子卒子太公和嗣

紀年齊宣公十五年田莊子卒明年立田悼子宣公四十七年悼子卒次立和莊子田成子殺齊君十二代而有齊國鬼谷子同按十二代者蓋自成子上下推之而中加悼子也

太公亦相宣公宣公卒子康公淫于酒婦人不聽政太公乃遷康公于海上食一城以奉其先祀康公之十八

年太公與魏文侯會濁澤求為諸侯魏文侯乃使使言
周天子及諸侯天子許之田和立為齊侯列于周室太
公元年周安王之十六年也二年

徐廣曰伐魯破之

太公薨子

桓公午即位

紀年齊康公五年田侯午生二十二年田侯剌立後
十年田午弑其君及孺子喜而為公春秋後傳田午
弑田侯及孺子喜而兼齊是為桓侯 按後傳脫剌
一代

桓公五年韓魏趙伐我至桑邱

此下云秦魏攻韓韓求救于齊齊陰許之而起兵襲燕取桑邱 按此乃湣王十年伐燕噲子之之事史記誤

六年救衛

紀年桓公十一年弑其君母

是年桓公薨

紀年梁惠王十三年當桓公十八年其後威王始見

蓋桓公在位十九年

威王 宣王

威王名因齊桓公之子也桓公六年薨威王即位是年
故齊康公卒絕無後奉邑皆入田氏威王元年三晉因我
喪來伐我靈邱六年魯伐我入陽關三晉伐我至博陵

史記作晉
蓋脫三字

七年衛伐我取薛陵九年趙伐我取甄王即

位以來不治委政卿大夫九年之間諸侯並伐國人不
治于是王召即墨大夫而語之曰自子之居即墨也毀

言日至然吾使人視即墨田野闢民人給官無留事東方以寧是子不事吾左右以求譽也封之萬家召阿大夫語曰自子之守阿譽言日聞然使使視阿田野不闢民貧苦昔日趙攻甄子弗能救衛取薛陵子弗知是子以幣厚吾左右以求譽也是日烹阿大夫及左右嘗譽者皆并烹之

考要譽阿大夫者
佞臣周破胡也

遂起兵西擊趙衛敗魏

于濁澤而圍惠王惠王獻觀以和趙人歸我長城于是齊國震懼人人不敢飾非務盡其誠齊國大治諸侯聞

之莫敢致兵于齊二十餘年鄒忌相封以下邳號曰成
侯二十三年與趙王會平陸二十四年與魏王會田于
郊魏王問曰王亦有寶乎王曰無有魏王曰寡人國小
也尚有徑寸之珠照車前後各十二乘者十枚奈何以
萬乘之國而無寶乎王曰寡人之所以為寶與王異吾
臣有檀子者使守南城則楚人不敢為寇東取泗上十
二諸侯皆來朝吾臣有盼子者使守高唐則趙人不敢
東漁于河吾吏有黔夫者使守徐州則燕人祭北門趙

人祭西門徙而徙者七千餘家吾吏有種首者使備盜賊則道不拾遺將以照千里豈特十二乘哉魏王慙不懌而去

韓詩外傳作宣王

二十六年魏圍邯鄲趙求救于我王

使田忌南攻襄陵及邯鄲拔因起兵擊魏大敗之桂陵于是齊最彊于諸侯自稱為王以令天下三十三年殺其夫人牟辛

年表作夫人世家作夫人紀年宣王八年殺其王后三十六年王薨謚曰威在位三十六年子辟疆即位是

為宣王宣王二年魏伐趙趙與韓擊魏趙不利戰于南
梁韓氏請救于齊王陰告韓使者而遣之韓恃齊五戰
不勝而東委國于齊齊因起兵使田忌田嬰將孫臏為
帥救韓趙以擊魏大敗之馬陵殺其將龐涓虜其太子
申其後三晉之王皆因田嬰朝王于博望盟而去七年
與魏王會平河南明年復會甄明年與魏襄王會徐州
諸侯相王十年楚圍我徐州十一年與魏伐趙趙決河
水灌齊魏兵罷十九年王薨諡曰宣在位十九年宣王

喜文學游說之士自如鄒衍淳于髡田駢接予慎到環淵之徒七十六人皆賜列第為上大夫不治而議論是以稷下學士復盛且數百十人

史記世家

湣王 襄王 王建

湣王名地

系本名遂

宣王之子也宣王薨湣王即位元年秦

使張儀與諸侯執政會于齧桑三年封田嬰于薛四年迎婦于秦七年與宋攻魏敗之觀澤十二年攻魏二十三年與秦擊敗楚于重邱二十四年秦涇陽君質于齊

二十五年歸涇陽君于秦薛文入秦即相秦文亡去二十六年與韓魏共攻秦至函谷君焉二十八年秦與韓河外以和兵罷二十九年佐趙滅中山三十六年王為東帝秦昭王為西帝蘇代自燕來見于章華東門王曰嘻善子來秦使魏冉致帝子以為何如對曰王之間臣也卒而患之所從來微願王受之而勿備稱也秦稱之天下安之王乃稱之無後也且讓爭帝名無傷也秦稱之天下惡之王因勿稱以收天下此大資也且天下兩

立帝王以天下為尊齊乎尊秦乎王曰尊秦曰釋帝天下愛齊乎愛秦乎王曰愛齊而憎秦曰兩帝立約伐趙孰與伐桀宋之利王曰伐桀宋利對曰夫約鈞然與秦為帝而天下獨尊秦而輕齊釋帝則天下愛齊而憎秦伐趙不如伐桀宋之利故願王明釋帝以收天下倍約賓秦與爭重而王以其間舉宋夫有宋衛之陽地危有濟西趙之阿東國危有淮北楚之東國危有陶平陸梁門不開釋帝而貸之以伐桀宋之事國重而名尊燕楚

所以形服天下莫敢不聽此湯武之舉敬秦以為名而後使天下憎之此所謂以卑為尊者也願王熟慮之于
是齊去帝復為王秦亦去帝位三十八年伐宋宋王出
亡死于溫齊南割楚之淮北西侵三晉欲以并周室為
天子泗上諸侯鄒魯之君皆稱臣諸侯恐懼三十九年
秦伐我拔列城九四十年燕秦三晉各出銳師伐我敗
我濟西

鹽鐵論
王奮二世之餘烈南舉楚淮北并巨宋苞十

二國西摧三晉卻彊秦五國賓從鄒魯之君泗上諸侯皆入臣矜功不休百姓不堪故諸侯合謀伐之

燕師遂入臨菑取齊之寶藏器王出亡之衛衛君辟宮舍之稱臣而共具王不遜衛人侵之王走鄒魯有驕色鄒魯弗內遂走莒楚使淖齒將兵救齊因相王淖齒遂殺王而與燕共分齊之侵地鹵器王在位四十年謚曰湣湣王之遇殺子法章變名姓為莒太史敫家庸久之乃敢自言我湣王子也于是莒人共立法章是為襄王

以保莒城而布告齊國中王已立在莒矣襄王既即位
立太史敫女為王后是為君王后襄王在莒五年田單
攻破燕軍迎王于莒入臨菑齊故地盡復屬齊十四年
秦擊我剛壽十九年王薨謚曰襄在位十九年子建即
位六年秦攻趙齊楚救之秦計曰齊楚救趙親則退兵
不親遂攻之趙無食請粟于齊齊不聽周子曰蓋齊之
謀臣國
策以為蘇
秦非是不如聽之以退秦兵不聽則秦兵不却是秦
之計中而齊楚之計過也且趙之于齊楚扞蔽也猶齒

之有唇也唇亡則齒寒今日亡趙明日患及齊楚且救趙之務宜若奉漏甕沃焦釜也夫救趙高義也却秦兵顯名也義救亡國威却彊秦之兵不務為此而務愛粟為國計者過矣王弗聽秦破趙于長平遂圍邯鄲十六年秦滅周君王后卒二十三年秦置東郡二十八年王入朝秦秦王置酒咸陽三十五年秦滅韓三十七年秦滅趙三十九年秦破燕明年秦滅魏秦兵次于厯下四十二年秦滅楚明年虜代王喜滅燕王喜四十四年秦

兵擊齊王聽相后勝計不戰以兵降秦秦虜王建遷之
共遂滅齊為郡天下壹并于秦秦皇政立號為皇帝齊
人怨王建不蚤與諸侯合從攻秦聽姦臣賓客以亡其
國歌之曰松耶栢耶住建共者客耶疾建用客之不審
也建在位四十四年

史記
世家

贊曰國不虛繫民必有歸姜替而媯隆陰德盛也潛王
赫赫茂天子抗彊秦一旦國破身弑者聞諸先民曰穉
木所以滋長伏金所以滋殺氣有豐殺天時以移德之

于人也猶是夫昔箕子過朝歌嘗為佻童之詩松柏之歌悲怨乃與向者同可勝歎哉可勝歎哉

尚史卷二十一

欽定四庫全書

尚史卷二十二

世家十五

鑲白旗漢軍李鐸撰

秦世家

始孝王時至赧王五十九年滅周又十年而帝蓋六百五十年有奇大業至大略系年莫攷自

非子至公子嬰傳三十六世

非子 秦侯 公伯 秦仲 莊公

秦嬴姓少昊之後也

秦趙以母族而祖顓頊非是按左傳鄭少昊之後嬴姓知秦為少昊

後秦之先帝顓頊之苗裔孫曰女脩女脩生子大業其父

不著又按史云女脩織玄鳥嘯卵女脩
吞之生大業蓋因商事附會故削之
大業取少典之

子曰女華女華生大費與禹平水土已成帝錫玄圭禹
受曰非予能成亦大費為輔帝舜曰咨爾費贊禹功其
賜爾阜游爾後嗣將大出乃妻之姚姓之玉女大費拜
受佐舜調馴鳥獸鳥獸多馴服是為栢翳舜賜姓羸氏
大費生子二人一曰大廉實鳥俗氏二曰若木實費氏
其玄孫曰費昌子孫或在中國或在夷狄費昌當夏桀
之時去夏歸商為湯御以敗桀于鳴條大廉玄孫曰孟

戲中衍鳥身人言帝大戊聞而卜之使御吉遂致使御而妻之自大戊以下中衍之後遂世有功以佐殷國故嬴姓多顯遂為諸侯其玄孫曰仲湏在西戎保西垂生蜚廉蜚廉生惡來惡來有力

晏子春秋惡來子裂虎咒

蜚廉善走父

子俱以材力事殷紂周武王伐紂並殺惡來是時蜚廉為紂石北方還無所報為壇霍太山而報得石棺銘曰

帝令處父不與殷亂

處父蜚廉別號

賜爾石棺以華氏死遂葬

于霍太山蜚廉復有子曰季勝季勝生孟增孟增幸于

成王是為宅臯狼臯狼生衡父衡父生造父造父以善

御幸于繆王得驥溫驪

溫音盜盜竊也淺青色

驊騮騄耳之駟西

巡狩樂而忘歸徐偃王作亂造父為繆王御長驅歸周以救亂繆王以趙城封造父造父族由此為趙氏自蜚廉生季勝已下五世至造父別居趙趙衰其後也惡來

革者蜚廉子也蚤死

與前惡來或是二人

有子曰女防女防生旁臯旁

臯生大凡大凡生大駱大駱生非子以造父之寵皆蒙

趙城姓趙氏非子居犬邱好馬及畜善養息之犬邱人

言之孝王孝王召使主馬于汧渭之間馬大蕃息孝王
欲以為大駱適嗣申侯之女為大駱妻生子成為適申
侯乃言于孝王曰昔我先酈山之女為戎胥軒妻生中
湫以親故歸周保西垂西垂以其故和睦今我復與大
駱妻生適子成申駱重婚西戎皆服所以為王王其圖
之于是孝王曰昔伯翳為舜主畜畜多息故有土賜姓
嬴今其後世亦為朕息馬朕其分土為附庸邑之秦使
復續嬴氏祀號曰秦嬴亦不廢申侯之女子為駱適者

以和西戎秦嬴生秦侯秦侯立十八年卒生公伯公伯立三年卒生秦仲秦仲立三年厲王無道諸侯或叛之西戎反王室滅犬邱大駱之族宣王即位乃以秦仲為大夫誅西戎西戎殺秦仲秦仲立二十三年死于戎有子五人其長曰莊公宣王乃召莊公昆弟五人與兵七千使伐西戎破之于是復與秦仲後及其先大駱地犬邱并有之為西垂大夫莊公居其故西犬邱立四十四

年薨

史記

襄公

附世父

襄公莊公之子也莊公子三人其長男世父世父曰戎殺我大父仲我非殺戎王則不敢入邑遂將擊戎讓其弟襄公為太子莊公薨襄公即位元年以女弟穆嬴為豐王妻二年戎圍犬邱世父世父擊之為戎人所虜歲餘復歸世父七年犬戎與申侯伐周殺幽王酈山下公將兵救周戰甚力有功周避犬戎難東徙維公以兵送平王王封公為諸侯賜之岐以西之地曰戎無道侵

奪我岐豐地秦能攻逐戎即有其地與誓封爵之公于是始國與諸侯通使聘享之禮乃用駟駒黃牛羝羊各三祠上帝西峙十二年伐戎而至岐薨

史記

在位十二年謚曰襄

文公

四十四年入春秋
靖公附

文公襄公之子也襄公薨公即位元年居西垂宮三年以兵七百人東獵四年至汧渭之會曰昔周邑我先秦嬴于此後卒獲為諸侯乃卜居之占曰吉即營邑之十

年初為廊時

括地志秦文公薨黃蛇自天而下屬地其口止于廊
衍作時郊祭白帝曰廊時

用三年十三年初有史以紀事民多化者十六年公以
兵伐戎戎敗走于是遂收周餘民有之地至岐岐以東
獻之周十九年得陳寶

晉太康地志文公時陳倉人獵得獸若羆不知名牽
以獻之逢二童子童子曰此名為媚常在地中食死

人腦即欲殺之拍捶其首媚亦語曰二童子名陳寶
得雄者王得雌者霸陳倉人乃逐二童子化為雉雌
止陳倉北坂為石秦祠之

二十年法初有三族之罪二十七年伐南山大梓豐大
特

錄異傳文公時雍南山有大梓樹公伐之輒有大風
雨樹生合不斷時一人病夜往山中聞鬼語樹神曰
秦若使人被髮以朱絲繞樹伐汝汝得不因邪樹神

無言明日病人語聞公如其言伐樹斷中有一青牛
出走入豐水中其後牛出豐水中使騎擊之不勝有
騎墮地復上髮解牛畏之入不出故置旄頭武都郡
立怒特祠是大梓牛神也

四十四年魯隱公初即位四十八年

隱五年

太子卒賜謚

為靖公靖公之長子為太子五十年

隱七年

公薨葬西山

史記

謚曰文在位五十年

寧公

寧公埶公之子文公之孫也文公薨公即位二年

隱九年

徙居平陽遣兵伐蕩社

索隱西戎之君號曰亳王蓋成湯之脣其邑曰蕩社

三年

隱十年

與亳戰亳王奔戎遂滅蕩社十二年

桓八年

伐

蕩氏取之公生十歲立立十二年薨葬西山

史記

帝王世紀寧公葬西山大麓號秦陵山

謚曰寧在位十二年

武公

附出子

武公寧公長男為太子魯姬子

寧公妻

生出子寧公薨大

庶長弗忌威壘三父廢太子而立出子為君

史記

出子二年

桓十年

我納芮伯萬于芮初芮伯出居魏芮更

立君寧公時我侵芮敗焉我會王師圍魏執芮伯以歸

至是納之

左傳

六年

桓十四年

三父等復共令人賊殺出子出子生五歲立

立六年卒三父等乃復立故太子武公公元

桓十五年

伐

彭戲氏

戎號也

至于華山下居平陽封宮三年

桓七年

誅三

父等夷三族以其殺出子也十年

莊六年

伐邽冀戎初縣

之十一年

莊七年

初縣杜鄭滅小虢

虢叔所封是曰西虢

二十年

莊十年

六年公薨葬雍平陽初以人從死從死者六十六人

史記

諡曰武在位二十年

德公

德公武公同母弟也武公薨公即位元年

莊七年

初居雍

城大鄭宮以犧三百牢祠廊時卜居雍後子孫飲馬于

河梁伯芮伯來朝二年

莊十年初伏暑也歷忌金氣伏藏

之日以狗禦蠱德公生三十三歲而立立二年薨

史記

謚曰德在位二年

宣公 成公

宣公德公長子也德公薨公即位元年

莊十年

衛燕伐周

出惠王立王子頹三年

莊十年

鄭伯虢叔殺子頹入惠

王四年

莊二十年

作密時

括地志秦宣公作密時于渭南祭青帝

與晉戰河

陽勝之十二年

莊三十年

公薨謚曰宣在位十二年宣公生

子九人莫立立其弟成公公元年莊三十一年梁伯芮伯來

朝四年

閔二年

公薨諡曰成在位四年成公生子七人莫

立立其弟任好是為穆公

史記

穆公

穆公名任好德公之少子也成公薨公即位元年

僖元年

公伐茅津勝之四年

僖四年

逆夫人于晉申生姊也五年

僖五年授百里奚政號曰五羖大夫以蹇叔為上大夫秋

公伐晉戰于河曲

史記

七年

僖七年

閏月惠王崩襄王立九年

僖九年

晉獻公卒晉

亂公子夷吾重賂我以求入冬我會齊師納晉惠公惠

公入而背我十年

僖十年

晉平鄭來聘鄭言于公請召呂

甥卻芮臣出晉君君納重耳公使冷至

大報問且召呂

卻卻芮殺平鄭鄭子豹來奔言于公曰晉侯背大主而

忌小怨民弗與也伐之必出公曰失衆焉能殺違禍誰

能出君十三年

僖十三年

晉薦饑乞糴于我平豹請伐晉公

曰其君是惡其民何罪于是輸粟于晉自雍及絳相繼

命之曰汎舟之役十四年

僖十四年

我饑乞糴于晉晉弗與

十五年

僖十五年

公伐晉使卜徒父筮之吉涉河侯車敗公

詰之對曰乃大吉也三敗必獲晉君其卦遇蠱三三曰

千乘三去三去之餘獲其雄狐狐蠱必其君也

千乘三句筮書雜辭

狐蠱為君義喻晉侯其象未聞

蠱之貞風也其悔山也歲云秋矣我落

其實而取其材所以克也實落材亡不敗何待九月戰

于韓獲晉侯以歸

史記晉君棄其軍與秦爭利還而馬驚繆公以麾下

馳追之不得晉君反為晉軍所圍晉擊繆公繆公傷
于是岐下食善馬者三百人馳冒晉軍晉軍解遂脫
繆公而反得晉君初繆公亡善馬岐下野人共得
而食之者三百餘人吏逐得欲法之繆公曰君子不
以畜產害人吾聞食善馬肉不飲酒傷人乃皆賜酒
而赦之三百人者聞秦擊晉皆求從從而見繆公窘
亦皆推鋒爭死以報食馬之德呂氏春秋穆公車敗
右服失而野人取之方將食于岐山之陽公曰食馬

肉而不還飲酒余恐傷女也徧飲而去處一年韓原之戰晉人已環穆公之車矣梁由靡已扣穆公之左驂矣惠公之右路石奮投而擊穆公之甲中之者已六札矣野人食馬肉者三百餘人畢力為穆公疾鬪于車下遂克晉反獲惠公

夫人以免服衰經逆乃舍諸靈臺許晉平冬與呂甥盟于五城改館晉侯饋七牢十一月歸晉侯是歲晉又饑公又餽之粟曰吾怨其君而矜其民且吾聞唐叔之封

也箕子曰其後必大晉其庸可冀乎姑樹德焉以待能

者于是我始征晉河東置官司馬十七年夏晉太子圉

為質于我因歸河東而妻之十八年僖十八年取梁新里十

九年僖十九年滅梁史記二十二年晉子圉亡

歸晉明年晉公子重耳來二十四年僖二十四年晉惠公卒

公納公子重耳重耳入立是為文公文公殺懷公即子圉

于高梁公誘殺呂甥卻芮于河上秋王叔帶以狄師攻

襄王王出適鄭二十五年僖二十五年公師于河上將納王

晉辭我師而納王秋及晉伐都

秦楚界上小國

楚商密降我師

二十八年

僖二十八年

少子慙

穆公子

及晉侯敗楚師于城濮

冬我及諸侯

晉魯齊宋蔡鄭陳莒邾

會于温天王狩于河陽二十

九年

僖二十九年

小子慙會盟于翟泉三十年

僖三十年

公會晉

侯圍鄭鄭使燭之武說公公與鄭人盟使杞子逢孫楊

孫戌之而還晉師亦還三十二年

僖三十二年

杞子使告于

我請襲鄭公訪諸蹇叔蹇叔不可公辭焉召百里孟明

視西乞術白乙丙使出師明年及滑鄭覺之杞子奔齊

逢孫揚孫奔宋我師滅滑而還晉敗我師于穀獲視乞術既而歸之公素服郊次鄉師而哭曰孤違蹇叔以辱

二三子孤之罪也不替孟明孤之過也大夫何罪且吾不以一眚掩大德三十五年

文二年

孟明視帥師伐晉戰

于彭衙我師敗績公猶用孟明視增修國政重施于民

三十六年

文三年

公伐晉取王官及郊晉人不出遂自茅

津濟封穀尸而還遂霸西戎三十七年

文四年

晉伐我圍

邠新城以報王官之役楚滅江公為之降服出次不舉

過數

言素服辟正寢去盛饌而過其禮數也

大夫諫公曰同盟滅雖不能

救敢不矜乎吾自懼也三十八年

文五年

春公薨以奄息

仲行鍼虎為殉

左傳

謚曰穆在位三十九年

康公

康公名罃穆公太子也穆公薨公即位晉襄公卒先蔑

士會來逆公子雍將立之康公元年

文七年

公送公子雍

于晉晉背先蔑而立靈公敗我師于令狐先蔑士會來

奔二年

文八年

我伐晉取武城以報令狐之役秋八月襄

王崩頃王立三年

文九年

我歸魯僖公成風之禭

曰衣服

四

年

文十年

晉伐我取少梁夏我伐晉取北徵六年

文十年

公

使西乞術如魯聘冬公伐晉取羈馬晉禦我師于河曲

我師歸復侵晉入瑕八年

文十四年

頃王崩匡王立十二年

文十八年春二月公薨

左傳

謚曰康在位十二年

共公

共公名稻

索隱名假

康公之子也康公薨公即位元年

宣元

晉侵崇以求成于我

崇秦與國

我弗與成二年

宣二

我伐晉

報崇遂圍焦冬十月匡王崩定王立四年

宣四

春正月

公薨

左傳

謚曰共在位四年

史記作五年

桓公

桓公

索隱自桓公至靈公並失名

共公之子也

史記

共公薨公即位四年

宣八

晉及白狄伐我獲我諜殺諸

絳市六日而蘇

史記三年晉敗我一將蓋即此事

十一年宣十五年公伐晉

晉敗我師于輔氏獲杜回十六年

成二年

右大夫說及魯

侯諸侯之大夫

楚宋陳衛鄭齊曹邾薛鄆蔡許

盟于蜀十九年

成五年

冬

十一月定王崩簡王立二十三年

成九年

我及白狄伐晉

二十五年

成十一年

我及晉成將會于令狐公不肯涉河次

于王城使史顓盟晉侯于河東晉卻犇盟公于河西公

歸而背成二十七年

成十三年

晉以諸侯之師伐我戰于麻

隧我師敗績獲我成差及不更女父二十八年

成十四年

冬

十月公薨

左傳

謚曰桓在位二十八年

史記作二十七年

景公

景公

世本景公名后伯車非是
后伯車景公之弟鍼也

桓公之子也桓公薨公

即位五年

襄元年

秋九月簡王崩靈王立十三年

襄九年

公

使士雉

大夫

乞師于楚將以伐晉楚許之秋我侵晉楚子

師于武城以為我援十四年

襄十年

晉伐我十五年

襄十一年

楚乞師于我使右大夫詹從楚子伐鄭鄭伯逆之伐宋

冬我伐晉戰于欒晉師敗績十六年

襄十
二年

庶長無地及

楚師伐宋秦嬴歸于楚楚公子午來聘十八年

襄十
四年晉

以諸侯之師伐我濟涇而次我毒涇上流師人多死晉
師還士鞅來奔已而復之

史記十八年晉悼公彊數會諸侯率以伐秦敗秦軍
秦軍走晉兵追之遂渡涇至棧林而還

二十八年

襄二十
四年

及晉成晉韓起來涖盟公子鍼如晉

涖盟三十年

襄二十
六年

鍼如晉脩成夏及楚子侵吳三十

一年襄二十七年宋欲弭諸侯之兵為會于宋來告許之

宋會

經傳皆不書秦蓋以微者會故三十二年襄二十八年冬十二月靈王崩景

王立三十六年昭元年公子鍼出奔晉終景公世乃復歸

四十年昭五年秋七月公薨明年春正月葬

左傳

謚曰景在位四十年

哀公 惠公 悼公

哀公景公之子也景公薨公即位十四年昭九年楚費無

忌來逆女夏楚陽句來聘拜夫人也十七年昭二十二年夏

四月景王崩悼王立王子朝作亂入于王城冬悼王崩

敬王立二十一年昭二十六年冬十月王入于成周王子朝

奔楚三十一年定四年吳入郢楚昭王奔隨申包胥來乞

師依庭牆哭七日公為之賦無衣使子蒲子虎帥車五

百乘以救楚明年敗吳師于沂秋滅唐又敗吳師于雍

澁三十六年定九年秋公薨冬葬哀公諡曰哀在位三十

六年孫惠公即位公九年哀三年冬十月薨子悼公即位

公元年哀四年春二月葬惠公十三年哀十六年孔子卒十五

年哀十年公薨是年敬王崩元王立

左傳

惠公在位九年悼公在位十五年

史記惠公十年悼公十四年

厲共公 躁公 懷公 靈公 簡公 惠公

附出子

厲共公悼公之子也悼公薨厲共公即位二年蜀人來
賂八年元王崩定王立十六年塹河旁以兵二萬伐大
荔取其王城二十一年初縣頻陽二十五年晉殺智伯
瑤智開來奔三十三年伐義渠虜其王三十四年公薨

謚曰厲共在位三十四年子躁公即位躁公二年南鄭反
是年定王崩考王立十三年義渠伐我至渭南十四年
公薨謚曰躁在位十四年弟懷公即位懷公三年考王
崩威王烈立四年庶長毚與大臣圍懷公公自殺謚曰
懷在位四年公太子昭子蚤死大臣乃立昭子之子是
為靈公靈公懷公孫也靈公六年晉城少梁我擊之十
三年城籍姑公薨謚曰靈在位十三年靈公季父悼子
即位是為簡公公昭子之弟而懷公之子也簡公六年

令吏初帶劔塹洛城重泉十年威烈王崩安王立十六

年公薨謚曰簡在位十六年子惠公即位

前有惠公不應上同先謚

史或誤

惠公十三年伐蜀取南鄭公薨謚曰惠在位十三

年子出子即位出子二年庶長改迎獻公殺出子及其

母沈之淵旁

史記

獻公 孝公

獻公名師隰靈公之子也靈公薨公不得立出子二年庶長迎公于河西而立之是為獻公秦以往者數易君

君臣乖亂故晉復奪我河西地獻公元年止從死二年
城櫟陽五年安王崩烈王立十一年周太史儋見公曰
周故與秦國合而別別五百歲復合合七十七歲而霸
王出十六年烈王崩顯王立桃冬花十八年雨金櫟陽
二十一年及晉戰于石門斬首六萬天子賀以黼黻二
十三年及魏晉戰少梁虜其將公孫痤二十四年公薨
諡曰獻在位二十四年孝公即位孝公名渠梁年已二
十一歲矣元年河山以東彊國六與齊威楚宣魏惠燕

悼韓哀趙成侯並淮泗之間小國十餘周室微諸侯力
政爭相併秦僻在雍不得與中國諸侯之會盟夷翟遇
之孝公于是布惠振孤寡招戰士明功賞下令國中曰
昔我穆公自岐雍之間修德行武東平晉亂以河為界
西霸戎翟廣地千里天子致伯諸侯畢賀為後世開業
甚光美會往者厲蹠簡公出子之不寧國家內憂未遑
外事三晉攻奪我先君河西地諸侯卑秦醜莫大焉獻
公即位鎮撫邊境徙治櫟陽且欲東伐復穆公之故地

修穆公之政令寡人思念先君之意常痛于心賓客羣臣有能出奇計彊秦者吾且尊官與之分土于是乃出兵東圍陝城西斬戎之獮王衛鞅聞是令下西入秦見公二年天子致胙三年鞅說公變法修刑內務耕稼外勸戰死之賞罰公善之拜鞅為左庶長七年及魏惠王會杜平八年及魏戰元里十年衛鞅圍魏安邑降之十二年作為咸陽築冀闕徙都之并諸小鄉聚集為大縣縣一令四十一縣為田開阡陌

南北為阡東西為陌河東以東西為阡南北為

陌東地渡洛十四年初為賦

為軍賦也

十九年天子致伯二

十年諸侯畢賀使公子少官率師會諸侯逢澤朝天子

二十二年衛鞅擊魏虜魏公子卬二十四年及晉戰鴈

門虜其將魏錯公薨

史記

謚曰孝在位二十四年

惠文王

惠文王

史記作君恐誤

名駟孝公之子也孝公薨惠文王即位

誅衛鞅元年楚韓趙蜀人來朝二年天子賀三年稱王

王冠四年天子致文武胙六年魏納陰晉更名寧秦七年公子卬及魏戰虜其將龍賈斬首八萬八年魏納河西地九年渡河取汾陰皮氏會魏王于應圍焦降之十年張儀相魏納上郡十五縣十一年縣義渠歸魏焦曲沃義渠君為臣十二年初臘十三年張儀取陝出其人與魏十四年更為元年

後世改元始此

二年張儀及齊楚大臣

會齧桑三年韓魏太子來朝張儀相魏四年周顯王崩慎靚王立五年王游至北河七年樂池相韓趙魏燕齊

帥匈奴共攻我我使庶長疾與戰修魚虜其將申差

五國

共伐而曰虜其將是司馬疎漏處申差蓋魏將也

敗趙公子渴韓太子奭斬首

八萬二千八年張儀復相九年司馬錯伐蜀滅之

史記于是

年書錯伐蜀滅之于十一年書公子通封于蜀又書丹犁臣蜀相壯殺蜀侯來降武王元年書誅蜀相壯

按

錯既已滅蜀安得又有相殺蜀侯事若以蜀侯為公子通通為秦公子又秦所封相壯既殺通豈復敢來降秦致華陽國志陳壯反殺蜀侯通秦遣甘茂張儀司馬錯伐蜀誅壯蓋即一事而史遷誤分為三又以蜀侯通誤為公子

取趙中都西陽十年周慎靚王崩赧王立韓太

子倉來質取韓石章敗趙將泥取義渠二十五城十一

年穽里疾攻魏焦降之敗韓岸門斬首萬走其將犀首
十二年王與梁王會臨晉庶長疾攻趙虜趙將壯張儀
相楚十三年庶長章擊楚于丹陽虜將屈匄斬首八萬
又攻楚漢中取地六百里置漢中郡使庶長疾助韓東
攻齊到滿助魏攻燕十四年伐楚取召陵王薨

史記

謚惠文在位二十七年

武王

武王名蕩惠文王之子也惠文王薨王即位韓魏齊楚

趙

一作越非是

皆賓從元年及魏哀王會臨晉

史記作惠王誤表作哀王

張儀魏章皆東出之魏伐義渠丹犂二年初置丞相樛

里疾甘茂為左右丞相三年及韓襄王會臨晉外樛里

疾相韓王謂甘茂曰寡人欲容車通三川窺周室死不

恨矣秋使甘茂庶長封伐宜陽四年拔宜陽斬首六萬

涉河城武遂

韓邑

魏太子來朝王有力好戲力士任鄙烏

獲孟說皆至大官王與孟說舉鼎絕臙八月王薨

史記

帝王世紀秦武王好力烏獲孟賁之徒歸焉孟賁生

拔牛角秦王舉周鼎烏獲兩目血出韓非子孟賁過河先其五船人怒以楫虺其頭中河孟賁瞋目而視船人髮植目裂鬢指舟中之人楊播入于河

謚曰武在位四年

皇覽秦武王冢在扶風安陵縣西北畢陌中大家是也人以為周文王冢

非

昭襄王

昭襄王名則一名稷武王異母弟也母楚人芊氏號宣太后武王取魏女為后無子王薨時昭襄王為質于燕

燕人送歸遂即位元年嚴君疾為相

或即擣里疾封蜀郡嚴道縣因號嚴

君二年庶長壯與大臣諸侯公子為逆皆伏誅及惠文后皆不得良死

紀年秦內亂殺其太后及公子雍公子壯史丹侯傳后先武王死

悼武王后出歸位三年王冠與楚王會黃棘與楚上庸四年取蒲坂五年魏王來朝應亭復與魏蒲坂六年蜀侯煇反司馬錯定蜀

華陽國志秦封王子燁為蜀侯蜀侯祭歸胙于王後
母疾之加毒以進王使司馬錯賜燁劍

庶長負伐楚斬首二萬七年拔新城樛里疾卒八年使
將軍芊戎攻楚取新市九年孟嘗君薛文來相負攻楚
取八城十年楚懷王來朝我留之薛文以金受免

正義
金受

秦相樓緩為丞相十一年齊韓魏趙宋中山五國共攻
我至鹽氏而還與韓魏河北及封陵以和楚懷王走之
趙趙不受還之秦即死歸葬十二年樓緩免穰侯魏冉

為相予楚粟五萬石十三年向壽伐韓取武始左更白起攻新城十四年白起攻韓魏于伊闕斬首二十四萬虜公孫喜拔五城十五年白起攻魏取垣復予之攻楚取宛十六年左更錯取軹及鄧魏冉免十七年城陽君入朝及東周君來朝王之宜陽十八年錯攻垣河雍決橋取之十九年王為西帝齊為東帝皆復去之呂禮來自歸任鄙卒二十年王之漢中又之上郡北河二十一年錯攻魏河內魏獻安邑出其人募徙河東賜爵赦罪

人遷之二十二年蒙武伐齊河東為九縣與楚王會宛
與趙王會中陽二十三年尉斯離與三晉燕伐齊破之
濟西與魏王會宜陽與韓王會新城二十四年與楚王
會鄢又會穰取魏安城至大梁燕趙救之我軍去魏冉
免相

十六年已書再免今復書免相蓋脫再相事

二十五年拔趙二城與韓

王會新城與魏王會新明邑二十六年赦罪人遷之冉
復相二十七年錯攻楚赦罪人遷之南陽白起攻趙取
代光狼城司馬錯攻楚黔中拔之二十八年白起攻楚

取鄢鄧赦罪人遷之二十九年白起攻楚取郢為南郡

楚王走周君來王與楚王會襄陵三十年蜀守若伐取

巫郡及江南為黔中郡三十一年白起伐魏取兩城楚

人反我江南

正義黔中郡反歸楚按此當云我反楚人江南今書法獨異未詳

三十二

年魏冉攻魏至大梁破暴鳶斬首四萬魏入三縣請和

三十三年客卿胡傷攻魏卷蔡陽長社取之擊芒卯華

陽破之斬首十五萬魏入南陽以和三十四年與魏韓

上庸地為一郡南陽免臣遷居之三十五年佐韓魏楚

伐燕初置南陽郡三十六年客卿竈攻齊取剛壽三十
八年胡傷攻趙閼與不能取四十年悼太子死四十一
年夏攻魏取邢邱懷四十二年安國君為太子十月宣
太后薨四十三年白起攻韓拔九城斬首五萬四十四
年攻韓南郡取之四十五年五大夫賁攻韓取十城四
十七年攻韓上黨上黨降趙我因攻趙趙發兵相距我
使白起擊大破趙于長平四十餘萬盡殺之四十八年
韓獻垣雍王齮伐趙武安皮牢拔之司馬梗北定太原

盡有韓上黨五大夫陵攻趙邯鄲四十九年益發卒佐
陵陵免王貳代將將軍張唐攻魏為蔡尉捐弗守還斬
之五十年白起有罪為士伍遷陰密張唐攻鄭拔之益
發卒軍汾城旁白起有罪死貳攻邯鄲不拔去還奔汾
軍二月餘攻晉軍斬首六千晉楚流死河二萬人攻汾
城即從唐拔寧新中更名安陽初作河橋五十一年將
軍摎攻韓取陽城負黍斬首四萬攻趙取二十餘縣首
虜九萬西周君背我與諸侯約從將天下銳兵出伊闕

攻我令我母得通陽城我使將軍摎攻西周西周君走
來自歸頓首受罪盡獻其邑三十六城口三萬王受獻
歸其君于周五十二年周民東亡其器九萬入秦周亡
五十三年天下來賓魏後我使摎伐魏取吳城韓王入
朝魏委國聽令五十四年王郊見上帝于雍五十六年
秋王薨

史記

韓非子昭王病百姓為之禱病愈殺牛塞禱郎中閭
遏公孫衍出見之見王賀曰過堯舜矣王病民以牛

禱病愈殺牛塞禱以王為過堯舜也王訾其里正與
伍老屯二甲居數月王飲酒酣閭逼公孫衍謂王曰
前時臣竊以王為過堯舜非敢諛也堯舜病民未至
為之禱也王病而民以牛禱病愈殺牛塞禱今乃訾
其里正與伍老屯二甲臣竊怪之王曰彼民之所以
為我用者非以吾愛之為我用以吾勢之為我用也
吾釋勢與民相收若是吾適不愛而民因不為我用
也故絕愛道也又曰昭王令工施鉤梯上華山以

松柏之心為博箭長八尺棊長八寸而勒之曰昭王
嘗與天神博于此

謚昭襄在位五十六年

孝文王 莊襄王

孝文王名柱昭襄王之子也昭襄王薨王即位尊唐八
子為唐太后而合其塋于先王

正義以其母為太后與昭王合塋

韓王

襄經入弔祠諸侯皆使使來弔祠視喪事元年赦罪人
修先王功臣褒厚親戚弛苑囿王除喪十月己亥即位

三日辛丑薨

索隱五十三而立
立一年卒塋壽陵

謚孝文在位一年子莊

襄王即位王名楚元年大赦罪人修先王功臣施德厚

骨肉而布惠于民東周君與諸侯謀我我使相國呂不

韋誅之盡入其國不絕其祀以陽人地賜周君奉其祭

祀使蒙驁伐韓韓獻成臯鞏秦界至大梁初置三川郡

二年使蒙驁攻趙定太原三年驁攻魏高都汲拔之攻

趙榆次新城狼孟取三十七城四月日食四年王翦攻

上黨初置太原郡魏將無忌率五國兵擊我我卻于河

外蒙驚敗解而去夏五月王薨

史記索隱三十二而立立四年葬陽陵謚

莊襄在位四年子政即位是為秦始皇帝

贊曰秦至襄公始國與諸侯通乃文立三族之法武以人從死馴至于穆遂殉三良其慘刻寡恩有非忠厚之遺及乎商鞅變法古則蕩然詩書之燼孝公誠為之嚆矢矣詩曰不愆不忘率由舊章書曰不師古訓于何其訓秦德戾古若是而威張欲從卒基帝業詎先民之言有不信乎火必燹而後燬水必滿而後決張秦乃所以

絕秦夫賈生云秦既逆取使得中主且可以守豈其然乎自獻公至莊襄計首功者凡百四十二萬八千天生胡亥毒噬諸嬴而滅頂望夷一以酬萬猶為歎夫



尚史卷二十二